

由庚堂集

由庚堂集卷之二十四

縉雲鄭汝璧邦章甫著

奏疏

條議防海六事疏

題臣惟封疆之臣職在修守故不問倭情
之叵測惟以備圉爲先圖山左之域海
環三面故不論一時之警息惟以周防
爲至計其大要在練兵修城積粟除器

使處處有武備時時有戒心急不周章
緩不玩愒以實事而責久功庶幾哉有
備可以無患爾臣以菲庸叨承重寄受
事以來日與諸司講求修舉頃復周巡
海上相閱兵戎伏嘆

祖宗舊制衛所基列軍伍星羅守其法不廢
何憂于倭韓而自京邊兩操之後城無
守兵勢難遽反今日海防似非

祖宗之舊矣去歲倭警震隣前撫臣悉心厝
置已有成緒臣承其後敢不勉圖振飭
惟是先時倭入朝鮮故北海之備獨詳
今者倭屯釜山則三面之備均急先時
重在分布故爲一時治標之劑今者重
在修守宜爲經久營衛之謀用是更加
調畫除置器械增哨船等項臣可徑行
者督令舉行應會

題者另疏具

請外所有練兵等事有見行而應

題飭及未行而應亟舉者謹列爲六款冒

昧上

陳伏乞

勅下該部如果臣言不謬覆

請施行海邦幸甚臣愚幸甚謹題請

旨

一練兵馬以重戰守照得兵貴精而在練以不練之兵戰是棄兵也與無兵同練而無法法行而不久始銳終瑕與不練同山東青齊之槍手雖可用而非素練卒然使之不可以陳先年調入浙中亦多喪失臣未敢謂可恃也郡邑之鄉兵應名而巳有名無餉難以久練而民且告擾臣亦未敢謂可恃也惟是臣標下

之兵與各道之快壯營中之壯軍餉頗厚而人可用要在練之得法爾臣受任以來查標兵與各道兵數可萬餘遂與諸道約籍而記之人各一單書疤記年貌以防替倩書所習兵器以備掣較臣躬督叅將梁文訓練標兵爲之倡以南教師教南技北教師教北技及行各道一體訓練每季點取各道戰兵與臣標

兵各以器技比試將官都司試二日布
按清軍兵巡道試一日總三日之技程
其優劣分爲四等一二等獎賞三等量
責再試四等革退將領哨官亦以此分
數爲勸懲邇來標下之兵似已可用諸
路亦知振奮矣但人心易玩非題

請申飭永加遵行恐始勸終怠久之漸弛則
亦與未練等爾至於鬪倭用步乃其常

技顧倭步而我亦步倘氣力相當勝負未決非有精騎馳驟則力殫而技窮且環海動以千里倘一角孤危懸於瞬息卽欲赴援而步兵足力易乏不能速至非出奇制勝之策也臣又將標營與濟南等七道共馬兵一千二百名取之標下合練練成分發各道每遇汛期仍聚練以聽調遣海防道及登文卽三營馬

兵六百名取之備倭衙門聽海防道監
練練成分發各營遇汛期亦聚練以聽
調遣馬有倒死朋合買補印烙驗視一
如邊方之例造冊籍記吊試賞罰一如
步兵之例大約山東一省練步兵一萬
三千馬兵一千八百專備戰守不許雜
差臣與諸道矢志而約但標下兵不及
諸路兵標下中軍將當之而臣任其責

諸路兵不及標兵諸路將當之而各道
任其責每歲終各道赴省綜覈臣將標
路諸兵馬查閱分數精強多者特加薦
敘弱而怠事者卽該道與標路將官併
加叅治庶時時有省試在在有強兵外
可消靖海氛內可彈壓中原臣所謂練
兵者如此請

勅該部覆飭臣等遵守施行伏乞

聖裁

一議積粟以廣貯蓄照得積貯軍

國之大計其在邊海兵荒不常尤宜預處
頃自倭警以來軍屯糧食青萊登之粟
不足以供乃從他地以輸又盡海濱而
徙飛輓艱難率二鍾而得一民間騷動
疾苦愁怨之聲載道矣比者歲凶粟匱
價日騰踊民復大感不能聊生此無它

東郡僻在海隅舟車罕至匱則坐困皆
積貯不廣之所致也萬一海上有警民
望名城以爲歸門扃不三日而城中告
急變且內作矣卽或歲復告稔方千里
胡以相恤此可不亟爲之備乎臣巡三
郡查核倉儲自今春賑煮之後庾廩空
虛臣深爲地方慮遂檄郡邑多方區處
每邑先足萬石郡數萬石以備不測各

屬亦以臣慮爲是加意奉行第官無糴
本民鮮義輸紙贖之貯無多里社之入
頗減殊難爲力因相講圖惟有民屯銀
兩拖欠數多時值歲艱追銀無措若許
上納襍糧若穆穀黍豆之類以折正項
民可樂輸總資實用又查開納事例東
郡上納爲數較少盖海濱粒米狼戾則
艱於貿易必以粟易錢以錢易銀又走

千里輸納于省每苦往返之艱遂多中止今事例另疏旣畱若令三郡許其輸粟本地稍免腳價以示招徠當有出而應者夫民屯爲本地存畱之糧民間往往視逋負爲常臣始嚴行查追民見謂迫故宜通其法於粟之中事例民間原少上納今導之輸粟其數自倍往日故宜權其法於例之外俟前銀歸部之日

卽爲停止亦無大碍此兩者皆積貯之
便計也若其他便宜臣固行之矣倘積
貯日富緩急有資無事以之給軍卽餉
也有事以之召募卽兵也卒有水旱可
以平糶亦可以恤民蓋一舉而裨益地
方不淺矣臣所謂積粟者如此伏乞

聖裁

一修城垣以固保障夫防倭之策守資于

城戰資于兵有堅城以固守而以勁兵
擊之逸待勞而飽待饑動可制勝第睹
海上諸城大都卑薄者多倭巧于攻東
人拙于守以巧攻遇拙守卽高堅猶足
慮況未高堅乎臣爲此懼細加查閱登
州城雖石而卑且無灰彌縫日以勾拆
又三面山也高過于城敵得窺我非敵
臺不可衝擊非加修加灰不可以久萊

州城雖磚而多陂側可攀援而登也亦必加敵臺始可施砲射而爲萬全計青州稍得地利耳其屬海邑若諸城樂安皆土城卽墨襟以沙隨葺隨壞昌邑土僅及肩傾圯且盡直與無城等耳必加以磚石費各踰萬金矣膠州磚城不滿三里官舍軍所占之民居十纔二三餘處城南繁且數倍其地直逼海口倘倭

乘潮而入民且無如僉謂宜於城南築
新城方六七里草草估費亦不下二萬
金矣此皆海上要區終當修築者也衛
所寨司之城在在而峙

國初設軍大城五千餘人小亦千計故其
城頗大塚口極多而今京邊赴操城中
落落茅茨多者百數十家少者三五十
家耳問之城守則搖首咋舌謂不死則

去安能棄命於岩墻蓋其勢然矣雖行
修理而無人居守徒費奚益警報一至
望風先避責以失守城寨之條亦不能
矣夫城可守而不併力以守則人棄城
城不可守而必強人以守則城棄人故
議者謂修要地以屯軍併餘城以收保
亦一策也臣已行道府將登萊二郡城
再加修築高堅并添敵臺以便衝打諸

城等處行令估計議處衛所等城如安東靈山鰲山大嵩靖海成山威海等處關係要害各加修理外其餘所寨人少去處姑量葺補無事之時任其安住一遇有警就近歸併以小就大以寡就衆合力拒守庶錢糧不妄費而趨向有寧心蓋邊方併堡之常規亦前撫臣孫鑛圖說所已及者也惟是應修應築之城

費頗不貲民力已訕官帑無多大難措處而捍衛生靈爲一勞永逸之計則勢又不可已臣竊計之事以人舉肥城黃縣俱係土城歲費修理知縣馬經綸張彙選一舉而新之以石民不告勞而功足保障使百城之吏皆如二令何工之不鳩乃志奪於憚煩事胥於怯費苟且目前卽可爲而中止方今地方多故意

外叵測不有堅城無論海警卽斬關之盜何以禦之殊足寒心宜行查處合將海上緊要諸城應亟圖者卽爲估計臣查堪動錢糧撙節應之稍緩諸城每年議修一面四年而畢工但遇每年圯壞係土築者卽先於壞處估易磚石得尺則尺漸可堅完如果經理有方民不告擾而工能底績者特加薦敘優擢以示

激勸庶病艾尚蓄于七年形勝漸增於
百雉亦地方久安之計也臣又查臨清
外城亦係土築嚮議包磚以工大未果
第此地漕運孔道商賈輿區萬一中原
有事卽萑葦嘯集必先垂涎所當加之
意者顧費踰十萬須加妥計倘不惜勞
費以固要害則臣當悉心重圖之耳臣
所謂修城者如此伏乞

聖裁

一開島田以佐軍資照得登州海北長山諸島離城僅四十里地土肥饒可堪耕種先年設有社著居民後因遼人潛住作耗故行驅逐徙民而空其地然以膏腴可耕之地委之蒿萊士人往往嘆惜屢議開復但仍欲以民佃居恐終起前釁因而中輟若以登州營衛之軍什伍

而耕如屯田之法以助糧餉資防守於
計爲便臣巡海上登城一望前島近若
几席之間與僻遠各島不同詢之故老
皆謂沃土不宜輕棄遣官查理島中原
有三城年久傾頽似應擇其可居者量
行修葺蓋草房百餘間以爲棲止之地
造遼船十餘隻以爲利涉之資酌地畝
之廣狹定軍兵之多寡責令該營總哨

官督率分布群聚而耕耕畢卽拏舟而返而耘鋤而收穫亦如之田塲旣畢悉以糧食裝載運至郡治一草一粒不令容畱其初耕也牛種官爲處給而其赴島也妻孥不使同行其受地也先給軍糧之少者以助其餉臨期從長酌處船隻則給付本管官專聽軍兵往來載渡不許別項差遣一切裝運薪米悉聽自

便一遇有警船可哨而兵可水且耕且防萬畝之地卽可資千軍之食有屯田之利無誨盜之害是亦一便也伏乞

聖裁

一置將領以便統率照得山東三面臨海北則登州南則膠州均爲要地然倭在朝鮮則登爲衝在金山對馬島則膠爲衝蓋地接淮揚一帆可直達而舟楫鱗

集民居多在城外犯則易以躪破尤非
登比也前撫臣孫鑛嘗語臣山東海防
第一膠州爲急臣閱其地信然矣今查
北海設將置兵爲備頗密而膠州至安
東寥寥數百里爲備似疎萬一倭犯膠
東登州備倭兵將救在十日之外其能
及乎然欲另行設將增兵勢又難處惟
在調劑而爲之畫耳臣看得卽墨營守

備駐卽墨縣之北離海頗遠先年海濱處處有兵故居內地以爲策援今衛所無兵則不宜膠柱而居且卽墨守備所管信地東接文登營僅百里西抵安東四五百里道里亦未適中故每遇汛期移駐膠州與其往來奔趨莫若移駐防守原領營兵隨便赴操加以所畱邊軍揀選精壯合營軍共足二千人俾之統

練使成一軍西可以控安東東可以援
卽墨而北亦可以援萊登南海之備周
而犄角之勢成計無便于此者惟是該
州軍民襍處剽悍多奸沿海衛所多而
人又玩非稍假事權難資彈壓應以都
司職銜管守備事仍節制於備倭將官
則無兩大之勢而有臂指之使矣查得
文登營守備張楷昂歲七尺之軀謀勇

千人之杰威名久著資俸兼深相應加
陞都司職銜管理卽墨營守備事就近
移駐膠州仍聽副總兵楊文節制其卽
墨營守備楊如松卽調補文登營各照
分管信地相機策應官不必添設而令
可遠申臣所爲南海地方議將者此其
一也王徐寨守備係近日新設該寨去
萊州黃縣各八十里東良海口在焉舊

有城寨故卽以居之亦一便也但城郭
卑薄人煙稀少其地孤虛不可居處各
軍每裹糧以操苦不能繼又係截殺之
兵不得株守一寨卽倭至而守此單薄
之孤城勢必難保徒滋縈制况萊州重
地兵力甚微倭至必舍王徐而犯萊州
乃不防其所必犯而牽繫于所不可守
似非善策合無將該寨守備就駐府城

操練以資保障每至汛期聽其量帶官兵赴寨哨防及照信地相機策應庶兵不疲而事有濟一轉移而萊郡地方可恃以無恐矣臣所爲北海將領議地者此其一也伏乞

聖裁

一分信地以專責成照得將死鼓士死綏明有專守也環海二千餘里之遙而不

爲之畫地而守則互相推諉互相推諉
則機宜必悞呼吸變而成敗分矣故必
信地分明方可責其必死先年止登州
文登卽墨三營今加王徐寨濱州爲伍
則信地之廣狹宜均也行據海防等道
酌查地里均勻畫守如卽墨營策應信
地則安東靈山鰲山三衛諸城石舊膠
州雄崖夏河浮山六所夾倉信陽南龍

灣古鎮逢猛栲栳島六巡司等處也文
登營策應信地則大嵩靖海成山三衛
大山海陽寧津尋山四所行村乳山赤
山溫泉四巡司等處也登州營策應信
地則威海寧海登州三衛百尺金山奇
山福山四所清泉蘆洋解宋劉家汪黃
河五寨辛汪高山楊家店孫芥四巡司
等處也王徐寨策應信地則萊州衛本

寨備禦一所馬停寨阜河馬埠塘頭四
寨馬停鎮東良柴葫海倉魚兒舖高家
港六巡司等處也濱州守備策應信地
則利津霑化海豐三縣境內海口牡礪
嘴濶水望大沙河大沽河等處也德州
守備遇有倭警則移駐武定州策應焉
分畫既定人自爲守但海防久弛法令
未嚴非

題行遵守日久將歸怠玩合無申飭守備
衛所等官如遇地方有警塘報飛至卽
各照分定信地統兵相機堵剿如賊犯
文登營界上該營守備不待調發卽行
統兵相機截殺隣境卽墨營守備領兵
馳赴協剿登州把總領兵移駐適中處
所聽候調遣策應如卽墨營界上有警
該營守備不待調發卽行領兵相機截

殺文登營守備領兵馳赴協剿王徐寨
守備領兵移駐適中處所聽候調遣策
應如登州營界上有警該營把總不待
調發卽行領兵相機截殺王徐寨守備
領兵馳赴協剿文登營守備移駐適中
處所聽候調遣策應如王徐寨界上有
警該寨守備不待調發卽行領兵相機
截殺登州營把總領兵馳赴協剿卽墨

營守備移駐適中處所聽候調遣策應
仍一面飛報備倭副將統兵應援其濱
州守備如利津界上有警不待調發卽
行統兵相機截殺德州守備領兵馳赴
協剿王徐寨守備移駐適中處所聽候
調遣策應臨清叅將移駐德州提兵督
率濱德二守備隨機策援防剿如或推
諉遲畱玩寇貽禍卽處以軍法事後案

課功罪以地爲準其該管衛所官兵有不聽約束督遣抗違凌上者一體以軍法從事庶地有成規將無岐志機宜不爽氣勢自全有率然首尾皆應之勢可免逗遛違悞之愆矣然臣愚過慮有不止于此者登萊海壖蕭條易於收斂若堅城固守以備倭等處之兵禦之倭必無幸若卒然直犯淮揚突入沂徐非有

勁兵堵截瞬息深入蹂躪動搖形若隱
而憂實大濱州以上則內海而勢稍緩
矣臨清叅將兵數不多策應內地其名
則是其實亡當夫臨清爲運道咽喉五
方要吭奸宄之所睥睨有將無兵示天
下弱卽如先年流寇起于中原至出京
軍而後定倭奴突犯淮揚橫行郡邑勢
莫能制設有宿將重兵扼吭擣虛夫豈

至此臣愚竊欲築外城添兵伍多則三千以一名將領之中原有事呼吸足應卽倭犯淮沂與標將合勦力全而功可奏不猶愈于擁備員而無裨緩急乎夫天下事苟求實濟則利用大作此臣區區迂計願與當事重圖者也伏乞

聖裁

請改謚疏

題臣據山東布政使司呈准按察司提學
道僉事周應治牒呈據濟南府呈據歷
城縣申准本府儒學呈據通學生員于
化等呈結查勘得已故鄉宦大學士殷
士儋委果進退有經言行足述文通之
謚委屬不類緣由到司爲照本宦丁年
登第皓首窮經簡輔青宮而進不隱賢
調燮

黃閣而必以其道總史局則史局重詞嚴
義正端亮可對天知典禮闡則禮闈重
聲律身度清貞堪爲世範當天驕乞款
而正色敢言卽時議未諧而孤忠自許
其立心制行大較可覩也已迨乞身湖
南而從遊者猶憚其威嚴日講學濟上
而樂與者想望其丰采邈自筮仕以及
蓋棺始終一節絕無脂韋之態表裏洞

然純乎剛正之風謚之以通殊爲不類
似應更謚庶肖生平合侯裁奪具

題等因通詳到臣案照先准禮部咨該中
書舍人殷盤具

奏前來本部移咨內開煩將已故鄉宦大
學士殷士儋宦蹟鄉評逐一查勘明確
原

賜謚號應否改擬明白具

題前來以憑覆議上

請施行等因准此已行該司道查勘去後今
據前因臣會同按臣議照歷城縣已故
鄉宦原任大學士殷士儋朴忠許國耿
介禔躬登翰苑而翌侍

青宮九經明於

講幄由宗伯而入參

黃閣一德簡自

帝心議大政則侃侃不阿義形詞色贊機務
每翼翼自靖志勵風雲偶未諧時堅

請歸里臯皮譚學師嚴而道益尊門徑張羅
身退而名愈重臣夷考鄉評博詢士論
咸謂本宦進則正言正色不與世以推
移退則淑已淑人能視道爲消息言皆
可述動足爲模

賜謚文通雖蒙

恩於華衮爰稽名實似未肖其生平蓋任質
絕不類於圓融而尚通殊無當于直諒
擬於其倫僉謂未協旣經各衙門查勘
前來相應據實具

題至於改謚

恩典出自

朝廷非臣等所敢擅議伏乞

勅下禮部覆議上

請施行謹題請

旨

補原任州官疏

題臣惟民生休戚寄之州縣正官顧擇人任官急矣而地屬邊海時值兵荒則尤急焉爲地得人幸矣而用之以所已試予之以所欲得則尤幸焉此爲地方計者所宜亟圖也臣查得山東登州府寧

海州逼海凋疲素稱難治今當倭警戒
嚴之秋兼值災傷重困之後時勢艱窘
又與往日不同一切安弭修守事宜全
在正官料理而新陞知州許璞向以事
羈半載尚未到任民情皇皇思得賢吏
如大旱之望霖先是知州陳善不職爲
前撫臣孫鑛叅劾去任士民翹首跂足
願得原任該州知州張以翔者仍來爲

原缺

勅下吏部再加查訪如果臣言不謬合無將
原任知州張以翔仍補寧海州知州其
新陞知州許璞另補別缺如張以翔已
經銓補卽以許璞互相調改庶一轉移
之間而地方有得人之慶矣謹題請

旨

由庚堂集

卷之二十四

七

由庚堂集卷之二十四終

由庚堂集卷之二十五

縉雲鄭汝璧邦章甫著

奏疏

請補謚疏

題臣據山東布政使司呈准按察司驛傳
帶管提學道副使詹思虞牒呈據登州
府呈據福山縣申行據本縣儒學牒呈
據廩增附生員張欽等呈結查勘得已

故鄉宦南京兵部尚書郭宗臯宦蹟鄉
評宜給謚廕緣由到司爲照本宦三朝
耆碩一代名賢入臺憲出監司風采夙
彰于

朝野三巡撫一總督威名丕振于邊陲危
言甘斧鑕捐糜攄報

國之忠抗節忤權奸竄逐老邊疆之戍迨
賜環蒙

恩于白首遂乞骸歸老于青山謝客杜門明
農課子耕山田以自給真一塵不染之
操甘貧約以終身有百折不迴之志若
本宦者其素履可以砥節維風其遺化
可以廉頑立懦所當優隆

恩錫以光天下者也所據陳乞謚號委應
請給合候裁奪具

題等因通詳到臣該臣會同按臣議照福

山縣已故鄉宦原任南京兵部尚書郭
宗臯高標鉅品直道宏猷抗疏劾折檻
之忠寧辭九死投荒甘窮海之戍益表
孤貞歷官則安攘垂勲歸田而端清著
節圖書四壁北海高月旦之評

使問三臨東山係

朝野之望允矣耆碩展也名臣臣備詢士
論咸謂本宦與同鄉吳嶽葛守禮均產

東土共稱達尊今二臣俱已

予謚本宦似應

賜給以勵臣工既經各衙門查勘前來相應

據實具

題至于

錫謚恩典出自

朝廷非臣等所敢擅議伏乞

勅下禮部覆議上

請施行謹題請

旨

叅衝災有司并議就近調補疏

題臣自去冬入境受事適值地方災傷日
與諸司殫力經營惟救荒弭盜二者爲
兢兢竊惟救荒不外于蠲賑然法難拘
泥如有地之民以蠲賦爲賑次貧之民
以散粟爲賑極貧之民無賦可蠲無火

可炊以煮粥爲賑故臣令有司賑煮兼舉聽其便宜又恐

請發銀粟有限令撥括臣等各衙門紙贖及堪動官銀移倉米于交東處米豆銀于登萊以濟其不足又示有司停止簿書專理荒政停徵錢糧寬恤民力其他平糴借貸諸事但可施行隨宜調劑防盜賊則分布各道快壯于州縣之市集分

布標下鋒兵于齊東之悍地分布臨清
濟寧之兵于沿海之要害擒盜止剪其
渠魁枉斃無辜者捕役抵死巡捕必更
于賢吏能解餘黨者卽紀上功以有司
巡行閭閻以守巡各道巡行郡邑而臣
以精神流貫察其勤惰獎長清縣知縣
李宗延等之救濟有方戒單縣知縣楊
從周等之散賑無法告戒稽查蓋已三

令而五申矣邇來祇承

明旨之所頒布與諸臣之所條議中有已行者臣嚴爲申飭應加修舉者臣極力振圖亦欲與諸有司相期實濟以無負我皇上嘉惠元元至意于萬一爾顧惟百城之吏才質不齊賢庸居半奉行未必如意則實惠有難及民故甌別區處爲今日第一要務臣已先行司道查覈近奉

明旨分別具奏復行逐一詳報臣覆加叅酌
其有司中或才未優長而心知惕勵或
志少精勤而才堪驅策者一面督責後
效另行酌議外惟是一二衝災地方亟
應議處者謹據實先爲

皇上陳之臣訪得東平州知州劉懋勲性本
昏庸才更迂緩該州災傷本重而報止
七分倉廩積穀尚多而不行一賑饑民

羣聚告濟又不親詣查審止委教官下鄉令地方供報不論貧富每十人刪去二三奉文賑穀不如法急散本州三十八屯每日止放三屯貧民往返不穀盤用咸不願領回家錢糧有示停徵仍用刑比責排頭劉宗付等幾死民甚怨之平糴倉穀五千石每石官價五錢乃通省祭官周士盛等加賣六七錢餘銀

入已至于保甲全不稽查盜賊橫行無忌舊館驛王濟儒家被族賊殺死六命本官隱久不報安山靳家閘饑民搶船數次本官先不捕戢後復周章閉門束手無策獲賊數人止責五板釋放盜愈滋肆臣詰責尚復推諉隣封不爲緝處非亟行該道撫賑貧民及擒首惡散脅從則沿海一帶幾釀大患矣其他若收

條鞭每兩加一二錢問詞訟淹滯至二

三月兌軍糧收耗至三四升人言嘖嘖

多有疵議而救荒怠玩防盜疎虞則過

蹟昭著民怨已深百口無以自解者也

汶上縣知縣馬大信初任頗知策勵近

政遂大乖踈該縣災重不減他邑而報

數全不以實蓋足未及于閭閻倉穀頗

有贏餘盡以小斗借出致今歲無以備

賑其心何曾切于民瘼臣行賑煮各屬
俱遍及四鄉本官止賑西南官路之側
餘俱未給致饑民李應元等千人懇告
批行賑撫始安臣行停徵示已兩月本
官乃利取羨餘仍比責里老李大湘等
至守道臨縣方移櫃停止開河袁家口
雙廟等處聚搶客船失事者屢矣乃推
調東平希圖掩飾非行濟寧道緝捕正

法分兵護防則盜風何由息乎他如審問人犯三四次尚無決斷左右倚藉爲奸民有混障之謠徵收賦稅令櫃頭上門加二發糴穀扣畱司銀加一難免瓜李之議所據本官才力稍勝于東平而救荒弭盜疎怠亦復相埒至其以屬官禮節之故與知州劉懋勲積成嫌隙視若寇仇州是而縣必以爲非縣直而州

必以爲曲奸豪乘間而生事端體統齟齬而多叢脞則二官各任其辜臣所恨者恤災

德意炳如日星而二官奉行不謹臣等申令備極焦勞而二官玩愒如故職守謂何俱應叅處者也叅照得東平州知州劉懋勲恤民全不關心流離載道而莫知救賑聞盜殊無措手劫掠多次而猶事

支吾操持頗干清議展措大拂輿情此
一官者政務盡隳民怨已積棄置亦不
爲過但任弗逾年守未狼狽似當重加
降調閒散以示懲創者也汶上縣知縣
馬大信災本重而報輕阡陌何曾親歷
事已失而支調寇盜任其縱橫待上事
每參商臨民視若秦越忤心多戾謠議
沸騰此一官者才力雖堪鞭策民牧實

已曠瘼亦當照例降調均示懲創者也
再照東平汶上二州縣地當南北要衝
盜賊淵藪民俗刁悍極號難治平時尤
貴擇人災歲豈宜久缺必得清貞練達
者方稱其任又須就近移補計時視事
乃可慰望歲之民情而振積弛之敝政
查得高唐州知州秦效鵬賦才卓犖治
理安詳已著廉能之譽更堪繁劇之投

武城縣知縣周六書操履端方才華敏
練小邑焉用牛刀康莊乃展驥足此二
官者在高唐雖亦孔道而時地尚易于
東平在武城實稱褊小而器使無庸于
兼品若以就近調補旣爲才地相宜且
于速任爲便相應一併題

請伏乞

勅下吏部再加查議如果臣言不謬將劉懋

勲等分別議處卽以高唐州知州秦效
鵬調補東平武城縣知縣周六書調補
汶上丞令赴任管事遺缺另補臣又查
得濟寧州水陸衝衢差繁賦重民困已
深蒞茲土者非遊刃之才不足以應卒
非端練之器不足以鎮繁本州五年四
易其正官諸務廢弛署篆者視若傳舍
莫能振刷卽今若不亟爲整理將來隳

墜益甚地方可虞近閱邸報該州知州
已將宣府下北路通判任國相陞補查
係邊方官員例應候代必得數月方至
見今災民告亟諸務叢委正官不可一
日缺人亦須就近陞補查得鄆城縣知
縣萬民命誠心潔守朗識長才治行著
效于輕車勛勳可期于熟路歷俸已幾
三年薦獎不下數次且係濟寧屬邑民

情素所周知相應陞補濟寧州知州以
便及時整理遺下員缺另補其任國相
改補別處乞

勅該部併議上

請定奪施行庶賢者用適其材不肖者處當
其臯吏治知警而民艱有濟矣謹題請

旨

敘救荒官員疏

題臣先准戶部咨爲傳奉

聖諭事該本部題內開借支京糧太倉等銀
十五萬兩河南發八萬兩行令光祿寺
寺丞鍾化民前往該省會同撫按賑施
山東發銀四萬兩江北發銀三萬兩總
督尚書李戴巡撫都御史鄭汝璧皆忠
誠任事聽其督率司道有司等官從長
賑濟等因題奉

聖旨是這銀米准照數作速發去鍾化民着以原官兼河南道監察御史前去料理荒政便寫勅與他江北山東就着各該巡撫官便宜區處賑濟所屬有司都着不拘年例會同巡按御史備查救荒實政分別賢否具奏近來四方多事國用空乏朝廷止以急救小民不惜散財發粟大行蠲賑各該奉行官吏宜共宣德意張布榜文除催

徵錢糧應蠲應緩外一切簿書期會等項
還着盡數從寬令有司得專心民事其餘
依擬欽此欽遵隨該本部委官良醞署監
事張琬解銀四萬兩前來并將臣先次
題

准畱漕折銀二萬兩及遼餉一半三萬六
千七百餘石并戶部

請畱京運銀二萬兩又漕折銀二萬兩俱行

布政司陸續分賑間又准戶部咨差太僕寺寺丞孫成憲賫奉

勅諭一道

內宮捐賑銀一萬一百六兩三錢到臣臣祇領給散又准戶部咨發

欽定各衙門助賑俸薪銀三千兩前來通行分賑訖先是去歲十一月內臣看得地方災困全在賑濟得人隨行各州縣官

一切停止簿書緩徵錢糧專理荒政先
儘本處積貯銀穀并臣等撫按各衙門
備賑贖銀粟及義民輸粟開納事例
米豆雜糧等項并原借臨德倉米通融
煮賑及頒規式令於在城村社多設粥
場廣收窮民就近食粥州縣官親自徧
歷驗查仍通行無災及災輕去處但有
流民就食一體給粥果救活人多者均

行薦敘臣又惟各該有司雖經專任責成但恐中間有材力不逮緩急失序者復於各府選委佐貳官總理賑事往來督察及奉

欽賑銀兩行委各府推官親行督散分給小票支領完日繳報臣抽查仍刊刻大字榜文奉揚

朝廷軫念災民屢發

帑金賑濟

德意宣布小民通知訖今照放賑事完行據
司道將賑過饑民銀粟數目并分別各
官賢否等第及各委官效勞冊揭到臣
除賑過文冊覆加詳覈造冊另疏

奏繳外臣會同按臣看得救荒乃有司職
分雖稱古無奇策然果實心料理於民
必有所濟其始之查審饑民也在於徧

詣閭閻報註以實繼之施賑銀穀也在
於隨地便民分給以實其惠無告而急
救垂死也在於廣行者煮粥巡核以實至
於奉散

欽賑銀兩尤當必躬必慎使分毫盡入貧民
之手庶遐邇均霑

浩蕩之恩故臣日以此責成正官嚴加程督
力難獨任者則以他官佐之事有未妥

者則以戒諭正之區處得宜者則以公
移獎之知過省奮而竟收實效者則取
其新而慰勞之無非仰體

皇上好生之仁以少盡臣等恤災之實各屬
一時頗覺兢勵雖中間地方有難易材
品有高下施爲幹濟不能盡一而殫竭
心力者要亦有人今奉

明旨分別具

奏臣敢不覈實以

聞謹按所屬六府去歲被災州縣內除平陰
縣災止三分及東阿縣雖報五分地方
頗安無庸多賑及災地正官已經事故
去任并署印官暫代不常無大功過者
俱不敢槩列外其餘地方災重或原報
雖輕而實難支持及本處災雖未重流
民就食多者不拘年例逐一分別以賑

濟稱善應敘錄者爲一等賑濟無失應
獎勸者爲一等功過相準應策勵者爲
一等其無狀應處者據實叅論敢一一
爲

皇上陳之查得曹州知州許恩泰安州知州
趙弘訓諸城縣知縣楊天民長清縣知
縣李宗延肥城縣知縣馬經綸昌樂縣
知縣李思孝萊蕪縣知縣馮盛明滕縣

知縣趙邦清高密縣知縣范垣曹縣知
縣郭養民臨淄縣知縣張汝雨沂水縣
知縣魏可簡觀城縣知縣劉中行樂安
縣知縣王國翼長山縣知縣馬一豸招
遠縣知縣劉光文定陶縣知縣陳以見
蓬萊縣知縣巫南金以上諸臣恤民悉
本真心救荒不遺餘力問疾苦徧歷于
郊關聚落而補助以時廣乳哺加意于

殘疾疲癯而煮賑如法雖治行不能盡
同而賑濟均爲稱善內長清縣知縣李
宗延肥城縣知縣馬經綸本地災雖五
分流民動踰萬計二官一體收養多有
生育于饑所者比之災屬功固倍之滕
縣知縣趙邦清始事間未中節臣等亦
嘗正之本官一加省練遂極苦心卽兗
州一府食粥饑民四十二萬而滕縣設

爨九十一所每日四萬九千餘人災重
且難全活者衆自難民其勤勞長山縣
知縣馬一豸本地雖係零災所收就食
流民頗多且委督新城等處十一州縣
散賑賢勞尤著定陶縣知縣陳以見才
氣未逾中人煮粥實盡心力出則同食
于粥場形已過羸于蒿目故臣不敢沒
其善狀所當均爲薦揚敘錄者也又查

得滋陽縣縣丞芮總初委魚臺查審不
辭勞苦繼佐單縣煮賑大有劑調蓬萊
縣主簿徐紹美署棲霞而饑民多濟勤
緝務而荒野獲安以上二官才守本優
勤渠稱最雖係佐貳亦應附薦者也曲
阜縣致仕侯代加銜運司同知孔弘復
濮州知州鄒希賢膠州知州羅啓先沂
州知州賈宗正濱州知州馮恂德州知

州劉道益都縣知縣劉養浩鄒縣知縣
馬復淳城武縣知縣張居仁鄆城縣知
縣今陞任萬民命鉅野縣知縣王國禎
新城縣知縣錢汝梁莘縣知縣楊同春
恩縣知縣孫居相陵縣知縣李必達壽
光縣知縣宋薦歷城縣知縣張鶴鳴章
丘縣知縣董復亨海豐縣知縣黃廷价
滋陽縣知縣蘇守一青城縣知縣王建

中郊城縣知縣文廣濟陽縣知縣黃應
魁昌邑縣知縣霍恕行嘉祥縣知縣劉
思顏范縣知縣蔡文會濰縣知縣林守
信萊陽縣知縣王從正日照縣知縣杜
一岸黃縣知縣張彙選德平縣知縣成
文選棲霞縣知縣鮑紋泗水縣知縣尤
應魯朝城縣知縣吳一龍壽張縣知縣
張受訓齊河縣知縣王汝濂新泰縣署

印德州同知李上林武定州署印按察
司照磨朱應遇以上諸臣或素政宜民
遇災更勞心于撫字或初任淬志隨事
卽殫力以經營或署印務而效勤民之
實或收流移而廣推食之仁均善調停
頗有實濟雖中間亦有災輕而力稍易
及任淺而功未弘者然要之拮据不遑
賑濟無失所當獎勵示勸者也平度州

知州汪會海福山縣知縣張所脩蒙陰
縣知縣張惟康霑化縣知縣孫至大商
河縣知縣何所見臨邑縣知縣陳正心
費縣知縣吳從禮金鄉縣知縣陸仁陽
信縣知縣汪海掖縣知縣高觀瀾以上
諸臣或才識平常而趨事猶謹瑕不得
以掩瑜或心力欲殫而條理多違功不
足以掩過所當行令策勵供職以責後

效者也又查得嶧縣知縣張拱辰才本
昏庸性更疎懶審饑民足迹不及閭閻
全憑里排之開報而貧富爲之混淆放
賑穀實惠未霑蒼赤惟縱衙奸之冒支
而倉庾爲之虛費煮粥已有行矣本官
偏執已見延至二月終方立爨所如饑
民李來趙二等餓死不知其數停徵已
有示矣本官視爲貨府乃至三月中猶

行比較如納戶李應洪等受苦奚可勝
言借領郊城穀三千石不行親放乃令
富戶總領多致侵漁勸借富戶銀七百
兩不行親給乃推庫吏預支見在鞠究
最可恨者惡貧民之抄化則設花子黃
守強等於四門令其鞭打驅逐而一任
死亡執案頭之匿名則繫生員李潤身
于囹圄坐以毆死貧民而幾誣抵命隳

頽已甚民牧謂何但履任甫及一年操守猶未大壞所當照例降調以示懲創者也單縣知縣楊從周禮貌龍鍾才識綿闇委查審于十里之開報貧窮遺漏者極多任給放于倉吏之支銷冒名重領者最衆監爨官蔡貴等家居數日不行煮粥而本官若罔聞知如白浮圖安德庄爨所可查貧民張倣等餓死道路

已數十人而本官慢不在念如章孟河
梁士元衆口可審奉文停徵錢糧而排
頭仍復嚴比豈以加耗之入不容已乎
馬推官之切責有由矣奉文掩骼死屍
而餓殍不令深埋豈其本心之明遂盡
死乎瞎城隍之嗤謗不誣矣吏弊叢積
而茫然莫曉非糧道嚴提該吏劉津治
罪則賑濟徒爲鼠竊之資耳荒政填委

而一籌莫展非守道呈委縣丞芮總代理則災黎盡爲溝中之瘠耳他如聽斷惟積書席養心之揆置而曲直不分拆封任門子劉乾之侵漁而臥起與共昏昏不任官常嘖嘖已騰衆議但到任更淺文學未荒所當姑令改教以示裁抑者也至于提綱挈領則屬之郡守如濟南府知府徐榜東昌府知府吳思學交

州府知府盧學禮青州府知府衛一鳳
登州府知府梁策以上諸臣民隱軫若
惻瘝吏治較如平準酌災萌而議賑哀
益協多寡之宜奉

德意以布宣科條垂州邑之式雅稱師帥大
惠蒸黎均當薦揚敘錄者也乃若分委
督理則屬之郡佐如東昌府同知劉承
忠交州府通判王狹吉青州府推官馬

從聘萊州府推官李雲鵠登州府推官
謝繼科濟南府推官馬洙東昌府推官
章堯相交州府推官曹汝校以上諸臣
矢心任事竭力奉公或督賑各屬而往
來備極其劬勩或督散帑金而分毫盡
釐乎弊蠹膏澤得下于民賢勞難泯其
實所當併薦敘錄者也又如登州府同
知張指南萊州府同知田應揚東昌府

通判韋守仁兖州府通判徐元卿登州府通判曹永年或署事而殫經理之能或運米而濟救焚之急勤勞亦有足取相應併行獎勵者也再照救荒雖責之守令而稽督全藉于監司監司巡行郡邑則守令徧歷鄉村中有應處事宜可以隨時調劑卽盜賊一時生發得以隨地消弭故臣復行守巡兵備各道分照

地方盡減騶從時常巡歷稽查以故州
縣官不敢寧居卽今災民霑惠地方獲
寧所據司道官員督理之功似不可泯
應照往例併敘查得分巡青州按察使
今回管司事陳文衡分巡濟南按察使
趙欽湯糧儲道左叅政今陞任王士性
分守濟南道右叅政汪應蛟分守海右
道右叅政沈九疇分守東兗道左叅政

今丁憂楊德政濟寧兵備道左叅政兼
僉事梅淳分巡兗州道副使趙壽祖海
防兵巡道副使今陞任徐成位帶管青
州道驛傳副使詹思虞武德兵備道副
使尹應元東昌兵巡道副使吳之龍沂
州兵備道僉事今陞本省叅議邵以仁
以上諸臣念徹窮氓身親部屋拯民艱
于巡行之際百姓欣若更生普

王仁于綜核之中群吏凜然兢奮一彈壓而
奸宄潛消共攄籌而地方安堵內王士
性定煮賑之規畫極其精詳徐成位處
海陬之兵荒綽有利賴揚德政下車卽
出行部母病不遑奉漿勞苦殊爲可憫
雖經陞任去任俱應一體敘薦者也然
分理固屬之分司而總理則本之總轄
查得布政司左布政使王藻右布政使

田疇勤宣

上德協濟時艱頒公帑而劑量悉均居然石
畫督群僚而章程具備允矣衡懸功已
著于保釐望更隆於屏翰均當薦揚敘
錄者也臣切惟一夫不獲耻在納溝東
土災稔異常死徙相望卽一時賑救不
敢謂無所濟然遺于所濟之外者亦多
矣仰荷

皇澤沛加倒懸始解臣方與各官悚息待罪
之不暇敢復貪

天爲功而以常職敘勞乎惟是救荒實難臣
始之責成頗嚴已而糾戒相繼今幸竣
事其效有勤勞者稍爲甄收少示激勸
與薦者用需敘錄行獎者止下文諭無
非祇奉

皇上分別之

旨以示綜覈之公而已伏乞

勅下該部再加查訪如果臣言不謬將府州
縣官徐榜等及司道官王藻等咨送吏
部紀錄優敘運司同知孔弘復等并同
知張指南等容臣會文獎諭知州汪會
海等行令策勵供職其知縣張拱辰等
聽該部核覆分別降改庶賢否不淆而
勸懲攸當人心知奮而吏治益脩矣謹

題請

旨

由庚堂集卷之二十五終